



# **PRIMEIRU MINISTRU**

## **DISKURSU SUA EXELÉNSIA PRIMEIRU-MINISTRU KAY RALA XANANA GUSMÃO**

### **IHA OKAZIAUN LANSAMENTU PORTAL EKONOMIA AZUL**

Salaun Nobre Ministériu Negósius Estranjeirus no Kooperasaun  
5 juñu 2026



Palácio do Governo  
Avenida Marginal  
Dili, Timor-Leste

Suas Exelências  
Señoras no Señores,

Feliz Loron Nasional ba Tasi!

Ha'u hanoin katak imi hotu sei konkorda ho ha'u katak objetivu jeral ne'ebé lori ba kriaun Portal Ekonomia Azul, hatudu klaru ona, liuhusi liafuan, no mós husi imajens.

Maibé, ha'u labele haluha atu reforsa importánsia eventu ohin-ne'e nian.

Ho lansamentu oficial Portal Ekonomia Azul ita fó tan pasu konketu ida atu transforma ita-nia rikeza mariña no marítima iha dezvoltimentu sustentável ba povu timor tomak.

Ita país ida ho tasi ne'ebé furak tebetebes, riku iha biodiversidade, iha rekursus peskeirus, iha potensial turístiku no enerjétiku. Maibé rekursu hirak-ne'e, mesak de'it, la garante dezvoltimentu sustentável.

Depende ba forma oinsá ita jere sira — ho koñesimentu sientífiku no komunitáriu, transparénsia no vizaun ba longu prazu — ne'ebé sei depende ba ita-nia Nasaun nia futuru.

Portal Ekonomia Azul nia objetivu mak:

- Atu halibur no disponibiliza dados ho informasoens kona-ba ita-nia espasu marítimu;
- Atu apoia formulasaun ho monitorizasaun polítikas públikas; no
- Atu promove kooperasaun entre Governu, setor privadu, instituisoens sientífikas, parseirus internasionais, organizasoens naun governamentais, comunidades kosteiras ho lokais no sidadaun sira hotu.

Bainhira sentraliza informasaun kona-ba setor barabarak ne'ebé engloba ekonomia azul, Portal ne'e sai hanesan ferramenta estratéjika ida hodi proteje ambiente mariñu, promove literasia tasi ho kultura marítima, planeia investmentus no kria empregu dignu, liuliu ba ita-nia joven sira, ba feto sira no ba comunidade sira ne'ebé depende diretamente ba tasi.

Hanesan Mana Betti dehan ona, Portal Ekonomia Azul ne'e, hanesan instrumentu ida tan ne'ebé ami tau ba dispozisaun públiku atu ita hotu-hotu bele sai intervenientes ativos iha dezígniu nasional foun ida, mak atu diversifika ekonomia ho forma inkluziva no ambientalmente sustentável.

Ita hakarak jera rikeza, maibé la estraga ekosistemas mariñus.

Ita hakarak halo buat foun no rekorre ba teknolojia, maibé la dezrespeita ita-nia kostumes ho tradisoens.

No ita hakarak defende soberania tomak ba ita-nia espasu marítimu nasional, maibé ita mós tenke loke an nafatin ba integrasaun ne'ebé boot liu iha rejiaun no mundu.

Exelénsias

Señoras no Señores,

Ha'u agradese ba ekipas técnicas nacionais, liuliu ba Gabinete Fronteiras Terrestres no Marítimas, ne'ebé kontribui ona ba kriaun plataforma ida-ne'e.

Ha'u agradese mós ba Membru Governu sira hotu ba sira-nia ekipas, tanba bele simu dezafiu atu hateke ba tasi, atu hanoin, no atu transforma iha políticas desenvolvimento sustentável.

Agora, no la menus importante, ita tenke komunika política nasional hirak-ne'e. Ita tenke komunika ita-nia Tasi!

Ita hakarak atu investigadores, empregáriu, estudantes ho sidadaun sira — nasionais no internasionais — bele hetan iha-ne'e, referénsia konfiável ida hodi koñese di'ak liu ita-nia tasi no partisipa iha nia oportunidades.

Ne'e signífika alimenta Portal ne'e ho dadus atualizadus, hadi'a nafatin nia funksionalidades no garante katak realmente bele utiliza hodi foti desizoens.

No signífika mós katak Portal ne'e hanesan símbolu ida husi boa governasaun: informasaun klara no asesível, prosesus ne'ebé transparentes liu no responsabilizasaun boot liu iha jestaun rekursus públikus ho rekursus naturais mariñus.

Nune'e, ha'u konvida imi hotu atu partisipa iha prosesu disponibilizasaun informasaun ne'e no uza instrumentu ne'e.

No, finalmente, ha'u konvida imi hotu atu servisu hamutuk ho ami atu ekonomia azul ne'e bele sai hanesan verdadeira alavanka dezvoltimentu ba Timor-Leste, ba benefísiu jerasoens atuais no futuras.

Ho orgulhu, ho konfiansa no ho esperansa ha'u lansa oficialmente Portal Ekonomia Azul Timor-Leste.

Muito obrigadu.

Kay Rala Xanana Gusmão